


ꦲꦶꦁꦲꦶꦁ
AWIG-AWIG

ꦢꦱꦱꦏꦫꦩꦤ꧀ꦱꦺꦏꦂꦥꦤꦢꦤ
DESA PAKRAMAN SEKAR PANDAN



ꦏꦧꦸꦥꦠꦺꦤ꧀ꦏꦭꦸꦁꦏꦸꦁ
KABUPATEN KLUNGKUNG

KABUPATEN KLUNGKUNG

ꦏꦺꦴꦩꦠꦤ꧀ꦤꦸꦱꦥꦺꦤꦢꦤ
KECAMATAN NUSA PENIDA

KECAMATAN NUSA PENIDA

ꦧꦶꦁꦠꦶꦤꦶꦭ
PROVINSI BALI

PROVINSI BALI

Murdha Citta

OM Swastyastu nama siddham.

Malarapan saking panghyangning Ida Sanghyang Widhi Wasa asung nugraha ngawentenang kahuripan sekala niskala ring bhuwana agung lan bhuwana alit. Manut drestha desane pinaka pasayuban warga lan krama desa rawuhing kulawarganya. Desane kasinanggeh bhuwana agung, pawongannya soang-soang pinaka bhuwana alit.

Sotaning bhuwana agung, desane kasinanggeh bhawa mahurip jangkep saha Tri Hita Karana luire :

- ha. Parhyangan, sahananing kahyangan panyiwian desa genah ngarcana Ida Sang Hyang Parama Wisesa maka jiwaan desane .
- na. Pawongan, sakatahing krama lan warga desa pinaka bhayu pramana, mawinan desane sidha molah maprawerti.
- ca. Palemahan, tanah kakuwuban desa sinanggeh pinaka sthula sariran desane.

Adung patemoning bhuwana agung lan bhuwana alit, maka larapan ngulati santha jagadhita, sinanggeh murddhaning prayojana pangriptaning awig-awig ring paseban krama desa, pinaka sepat siku-siku pamatut pamargin desa pakraman.

Dumadak prasidha pangaptin titiang sareng sami, angidep mwang amagehaken kadi linging awig-awig puniki.

OM Santih Santih Santih OM

DAGING

AWIG-AWIG DESA PAKRAMAN SEKAR PANDAN

MURDA CITTA	ha
PRATAMAS SARGAH : ARAN LAN WAWIDANGAN DESA	1
DWI TISYAS SARGAH : PATITIS LAN PAMIKUKUH	1
TRITISYAS SARGAH : SUKERTA TATA PAKRAMAN...	2
Palet 1 Indik Krama	2
Palet 2 Indik Prajuru Desa	6
Palet 3 Indik Kulkul	9
Palet 4 Indik Sangkepan lan Paruman	10
Palet 5 Indik Druwen Desa	12
Palet 6 IndikSukerta Pamitegep.....	14
Kaping 1 Indik Karang lan Tegal	14
Kaping 2 Indik Kakayonan	15
Kaping 3 Indik Wawangunan	16
Kaping 4 Indik Wawalungan	17
Kaping 5 Indik Bhaya lan Dusta	18
Kaping 6 Indik Pangunyan Desa	20
CATURTHAS SARGAH : SUKERTA TATA AGAMA	20
Palet 1 Indik Dewa Yadnya	20
Palet 2 Indik Resi Yadnya	25
Palet 3 Indik Pitra Yadnya	25
Palet 4 Indik Manusa Yadnya.....	39
Palet 5 Indik Buta Yadnya.....	30
PANCAMAS SARGAH : SUKERTA TATA PAWONGAN ...	31

Palet 1	Indik Pawiwahan	31
Palet 2	Indik Nyapihan.....	36
Palet 3	Indik Sentana	38
Palet 4	Indik Warisan	40
SADTHAS SARGAH : WICARA LAN PAMIDANDA		42
Palet 1	Indik Wicara	42
Palet 2	Indik Pamidanda.....	43
SAPTAMAS SARGAH : NGUWAH-NGUWUHIN AWIG AWIG		44
ASTAMAS SARGAH : SAMAPTA		45

PRATHAMAS SARGAH
ARAN LAN WAWIDANGAN DESA

Pawos 1

- (1) Desa puniki mawasta Desa Pakraman Sekar Pandan.
- (2) Jebar kakuwub wawidangannya mawates nyatur luire :
 - ha. Sisi Kangin : Desa Pakraman Klumpu
 - na. Sisi Kelod : Desa Pakraman Panca Mekar Sari
 - ca. Sisi Kauh : Desa Pakraman Sakti
 - ra. Sisi Kaler : Desa Pakraman Ped
- (3) Desa Pakraman Sekar Pandan kawangun antuk gebogan krama tur kaapah dados kalih Banjar, luire :
 - ha. Banjar Pakraman Angas Kaja
 - na. Banjar Pakraman Angas Kelod

DWITISYAS SARGAH
PATITIS LAN PAMIKUKUH

Pawos 2

- Luir patitis Desa Pakraman Sekar Pandan sakadi ring sor :
- ha. Mikukuhang muang ngarajegang Sanghyang Agama,
 - na. Nginggilang tata prawertining maagama,
 - ca. Ngarajegang kasukerthan desa saha pawongannya sakala lan niskala.

Pawos 3

Desa Pakraman Sekar Pandan ngamanggehang pamikukuh luire :

ha. Pancasila.

na. Undang-undang Dasar Negara Republik Indonesia Tahun 1945

ca. Tri Hita Karana manut sada cara Agama Hindu.

TRITYAS SARGAH SUKERTA TATA PAKRAMAN

Palet 1

Indik Krama

Pawos 4

- (1) Sane kabawos Warga Desa Pakraman Sekar Pandan inggih punika : sahananing Warga sane magama Hindu, jumenek ring wawidangan Desa Pakraman Sekar Pandan satinut ring daging awig-awig lan pararem Desa Pakraman Sekar Pandan.
- (2) Sane kabawos krama Desa Pakraman Sekar Pandan inggih punika : warga desa sane sampun alaki rabi, ngamong wiadin tan ngamong Karang Desa, nyungsung Kahyangan desa, tur satinut ring daging awig-awig lan pararem Desa Pakraman Sekar Pandan.
- (3) Warga sane mawed saking Desa Pakraman Sekar Pandan nanging magenah ring dura desa kangkat sareng makrama desa, swadharmanya kamanggehang manut pararem.
- (4) Sejaba sane kabawos ring wiwit (1), wiwit (2), lan wiwit (3) kabawos tamiu, majalaran antuk :
 - ha. Malelungayan ;
 - na. Sasudian desa utawi guru wisesa;

- ca. Masundulang raga;
- ra. Ngarereh pangupejiwa mwanj larapan sane siosan;
- ka. Kadang warga keluarga krama desa Pakraman;
- (5) Tamiu kapah dados 2 (kalih) soroh luwire :
 - ha. Tamiu sane magama Hindu ;
 - na. Tamiu sane magama siyosan ;
- (6) Krama tamiu kapidabdabin sakadi ring sor :
 - ha. Tamiu sane magama Hindu yan sampun tumekah lintang ring 35 (sasur) rahina, kengin katedunang makrama Desa, sajawaning sasudian Guru Wisesa.
 - na. tamiu sane magama siyosan nenten kapatutang tedun makrama Desa, nanging yan sampun jumenek lintang ring 35 (sasur) rahina, patut nawur jinah pasukadukan manut pararem.

Pawos 5

Krama Desa kaapah dados 7 (pitung) soroh luire :

- ha. Krama ngarep inggih punika : krama sane kantun jangkep alaki rabi
- na. Krama Pangele inggih punika : Truna tua durung merabian
- ca. Krama Kaputungan inggih punika : Krama sane nenten maduwe sentana
- ra. Krama Balu angkep inggih punika : Balu luh utawi balu muwani sane maduwe sentana lanang lan istri
- ka. Krama Roban inggih punika : Krama sane pangrahuhe saking kulewarga siyosan, nanging karobang olih sinalih tunggil krama desa
- da. Krama Ubuh inggih punika : Krama sane katinggal olih yayah rena
- ta. Krama Tapukan inggih punika : balu lanang sane maduwe oka istri utawi balu luh sane maduwe oka lanang, sowang-sowang sampun mayusa 17 (pitulas) warsa.

Pawos 6

- (1) Swadharmaning krama desa patut keni ayah-ayahan sekadi ring sor :
 - ha. Krama ngarep ngamargiang ayah krama ngarep;
 - na. Krama pangele ngamargiang ayah krama pangele;
 - ca. Krama kaputungan ngamargiang ayah krama kaputungan jantos mayusa 60 (enem dasa) warsa
 - ra. Krama balu angkep keni ayah-ayahan lan urunan manut pararem;
 - ka. Krama roban mawit saking kerama desa patut ngemargiang swadharmaning krama roban;
- (2) Anak-anaking krama sane sampun munggah deha wiadin teruna patut ngamiletin sekaa teruna, tur kangkat ngentosin ayah-ayahan reramanya.
- (3) Sahananing krama patut sungkem ring tatiwak saking Guru Wisesa.

Pawos 7

- (1) Peson-peson muang urunan desa sekadi ring sor :
 - ha. Krama ngarep keni peson-peson miwah paturunan mamungkul;
 - na. Krama pangele keni urunan lan peson-peson atengan saking krama ngarep;
 - ca. Krama putungan keni peson-peson pateh sekadi krama ngarep jantos mayusa 60 (enem dasa) warsa, salantur ipun patut luput sahananing peson-peson.
- (2) Prade ring desa wenten pakaryan sane abot, patut karemba antuk krama lan warga desa sami.
- (3) Yan wenten krama tan nganutin kadi kecap ring ajeng, wenang keni pamidanda manut pararem.

Pawos 8

- (1) Swadharmaning tamiu patut ninutin pamargin kertha lan tata kasutreptian Desa Pakraman Sekar Pandan.

- (2) Krama sane ngeraksa tamiu patut matur supeksa ring prajuru desa tan kasepan ring awengi.
- (3) Tamiu sasudian Guru Wisesa sane jumenek ring Desa Pakraman Sekar Pandan lintang ring 35 (sasur) rahina kakeninin punia nyabran wenten karya utawi piodalan ring Kahyangan Desa.

Pawos 9

- (1) Krama sane wenang polih laluputan pemargi utawi ayah-ayahan luire :
 - ha. Para pemangku desa;
 - na. Prajuru lan pacalang desa;
 - ca. Krama sane cedangga banget utawi sungkan tahunan;
 - ra. Krama ubuh utawi krama tapukan sadurung mayusa 17 (pitulas) warsa;
- (2) Laluputan inucap maundadika sekadi ring sor :
 - ha. Para Pamangku Desa luput ayah-ayahan krama, peson-peson miwah urunan;
 - na. Prajuru polih luput peson-peson reramon kawanten;
 - ca. Krama sane cedangga banget lan sungkan tahunan polih luput manut pararem;
 - ra. Krama ubuh utawi krama tapukan sadurung mayusa 17 (pitulas) warsa luput peson-peson, ayahan krama miwah urunan;

Pawos 10

- (1) Wusan makrama desa majalaran sekadi ring sor :
 - ha. Seda utawi lampus.
 - na. Kesah ka dura desa saking rahayu maduluran antuk ilikita saking prajuru desa.

- ca. Kausanang utawi kadaut pipilnia sajeroning paruman desa riantukan kasinanggeh banget kasisipannia ring desa.
- (2) Wusan utawi ngusanang krama, panemayannia padgatakala manut pararem.
- (3) Sang wusan makrama tan polih pah-pahan druwen desa sakaluirnya.
- (4) Prade sang pecak wusan makrama desa malih mapinunas pacang mawali makrama, patut katrima tur kapidababin sakadi ring sor :
- ha. Yaning wusannya riin saking rahayu, patut nawur panawub wawangunan manut pararem.
- na. Yaning wusannya sangkaning tan rahayu, patut keni panawub wewangunan lan pamidanda ular-alir manut pararem, sasampune nunas pengampura sajeroning paruman desa.
- (5) Sang wusan makrama patut :
- ha. Warisnya patut ngelanturang pemargi ayahan krama, utawi muputang sahananing paiketan wicara ring desa manut pararem;
- na. Warga inucap tan wenang ngereredan bakti lan sutindihnya sekala lan niskala ring Desa Pakraman Sekar Pandan ;
- (6) Sang sane wusan makrama patut muputang sakatah utang piutang ring desa saha ngaturang utawi ngewaliang sahananing padruwen Desa Pakraman sane kanton kagamel tur tan polih pah-pahan padruwen Desa Pakraman.

Palet 2

Prajuru Desa

Pawos 11

- (1) Desa Pakraman Sekar Pandan kaenter olih Bandesa Pakraman kasanggra olih :
- ha. Patajuh pinaka wakil;
- na. Panyarikan pinaka juru surat;

- ca. Patengen pinaka juru raksa;
 ra. Kasinoman pinaka juru arah;
 ka. Kelihan Banjar pinaka suku tanganing Bandesa ring Banjar.
 da. Pacalang Desa pinaka jaga bhaya desa
- (2) Krama Banjar kaenter olih Kelihan Banjar.
- (3) Gaguat sang pacang kaadegang dados prajuru desa sekadi ring sor :
 ha. Mawit saking krama ngarep;
 na. Jujur tur polos;
 ca. Maparisolah becik tur tan cedangga banget;
 ra. Uning ngawacen lan nyurat;
 ka. Uning ring panglokika lan wicaksana;
- (4) Nyudi lan ngadegang prajuru patut kalaksanayang olih krama sajeroning paruman.
- (5) Waneng dados prajuru desa kamanggehang 5 (limang) warsa , tur dados kasudi malih apisan.
- (6) Tata cara nyudi lan ngadegang prajuru sakadi ring sor :
 ha. Patut nganutin awig-awig muwang pararem desa sane sampun kamanggehang.
 na. Maduluran antuk Dewa saksi ring Kahyangan desa.
 ca. Ngapisinggihang daging kecap pamikukuh desa lan sastra agama.
 ra. Bandesa Pakraman kasudi olih krama muwang warga desa sane sampun mayusa 17 (pitulas) warsa.
- (6) Sanistanya asasih sadurung tutup sengker dados prajuru, Prajuru patut nyerahang swadharmanya sajeroning paruman desa mangda kawentenang sasudian malih.

Pawos 12

- (1) Swadharmaning Bandesa Pakraman luire :
 ha. Ngenterang pamargin sadaging awig-awig, muang pararem desa;
 na. Nuntun tur ngenterang krama lan warga desa ngupadi antuk patitis muang pamikukuh desa.

- ca. Ngenterang pamargin yadnya manut awig-awig lan pararem.
 - ra. Ngenterang tur ngawigunayang padruwen desa Pakraman manut pararem;
 - ka. Maka duta Desa sajeroning matemu baos majeng ring sapa sira ugi, midabdabin miwah mutusang wicara manut awig-awig.
 - da. Nambyakang miwah ngamargiang pawarah Guru Wisesa;
 - ta. Wenang ngemargiang sahananing pararem ngupadi tatujon lan kawigunan sane rahayu.
- (2) Sajeroning ngenterang pemargin Pakraman, Bandesa Pakraman patut ngawentenang pawirasan ring prajuru, kasarengin antuk para yoga sane wenten ring Desa Pakraman Sekar Pandan mangda tan singsal pamargi.
 - (3) Swadharmaning prajuru sane siyosan, sawawaning gegaduhan manut pawos 11 (solas) wiwit (1), taler patut ngarombo Bandesa Pakraman sajeroning pawirasan kadi kecaping ajeng.
 - (4) Prade wenten sinalih tunggil prajuru iwang pamargi makadi ngalinyokang druwen desa mwang sapanunggilannya tur kabuktiang kaiwangannya manut tri pramana, punapi malih banget tempal ring kecaping awig-awig lan pararem, patut keni pamidanda manut pararem, tur patut kausanang dados prajuru.
 - (5) Prajuru sane sajeroning wicara marep ring Desa Pakraman tan kapatutang midabdabin desa jantos wenten pamutus sane pastika indik kaiwangannya muang pamidandannya.

Pawos 13

Olih-olihan prajuru desa luire :

- ha. Polih cacenengan saluiring duman ring desa,
- na. Polih olih-olihan siyosan manut pararem.

Pawos 14

- (1) Prajuru desa kagentosin riantukan :

- ha. Seda;
 - na. Sampun tutug panemaya dados prajuru;
 - ca. Tan presida ngamargiang swadharmaning prajuru duaning katiben sungkan rahat utawi pialang abot siyosan tur kasungkemin sajeroning paruman desa;
 - ra. Pinunas ngraga tur sampun kalugra pinunasnya sajeroning paruman desa;
 - ka. Kanorayang sajeroning paruman desa duaning iwang pamargi;
- (2) Ngararyanang utawi ngentosin prajuru patut nganutin pamutus paruman desa.

Palet 3
Indik Kulkul
Pawos 15

- (1) Kulkul sane wenten ring Desa Pakraman Sekar Pandan luire :
- ha. Kulkul Desa Pakraman;
 - na. Kulkul Banjar
 - ca. Kulkul Pura;
 - ra. Kulkul Sekaa-sekaa;
- (2) Suaran kulkul kasinanggeh pinaka suaraning Desa utawi Sekaa, satmaka atur utawi dedawuhan saking prajuru ring kramannya sami.
- (3) Tabuh tatepakan kulkul inucap patut pastika manut tatujon tur manut ring pasubhayan kramannya.
- (4) Pamargi sane patut macihna antuk suaran kulkul luire :
- ha. Pacang sangkep utawi paruman desa;
 - na. Tedun makarya utawi ngayah
 - ca. Pacang ngarentebin utawi rikala wenten warga seda, ngarangkat utawi yadnya siyosan manut kabuatan.

ra. Wenten cihna bhaya;

ka. Ngawitin miwah nglebar catur brata panyepian

(5) Tatabuhan suaran kulkul luire :

ha. Tigang tuludan sedeng cihna : tedun ngayah, sangkep, parum, ngawitin lan nglebar brata panyepian.

na. Limang kelentungan sedeng rikala wengi cihna : wenten warga mawiwaha;

ca. Pitung kelentungan sedeng cihna : Ngerentebin kalayusekaran;

ra. Bulus sada panjang cihna : katiben bhaya;

ka. Negteg lan nyangsih cihna : Wenten Yadnya;

Pawos 16

(1) Sahananing kulkul desa Pakraman Sekar Pandan patut katepak olih prajuru, sajawining wenten wak-wakan saking prajuru manut tatujon.

(2) Sapasira ugi nyuarayang kulkul tan sangkaning wak-wakan saking prajurunnya, patut keni pamidanda manut pararem sajawaning katiben bhaya.

(3) Sang nyuarayang kulkul cihna katiben bhaya patut manggeh ring genah kulkul inucap saha matur supeksa ring prajuru mungguing tatujon panepakann

Palet 4

Indik Sangkepan lan Paruman

Pawos 17

(1) Sangkepan lan paruman ring Desa Pakraman Sekar Pandan luire :

ha. Pasangkepan Banjar Pakraman

- na. Pasangkepan Sekaa Gong,
 - ca. Pasangkepan Sekaa Teruna,
 - ra. Pasangkepan Sekaa-sekaa siyosan,
 - ka. Paruman Desa Pakraman.
- (2) Paruman inucap sida kamargiang sampun manut kadi ring sor :
- ha. Sangkaning suaran kulkul,
 - na. Sangkaning wenten pasobhyahan,
 - ca. Sangkaning Panumaya,
 - ra. Sangkaning wenten arah-arahan.
- (3) Sangkepan prajuru kawentenang sanistanya 6 (enem) sasih apisan.

Pawos 18

- (1) Sane patut kabaosang sajeroning paruman Desa Pakraman luire ;
- ha. Munjuk lungsuring krama muang ayah-ayahan,
 - na. Saluir sulur artha berana druen desa,
 - ca. Pamargin shananing pamutus paruman sadurungnya,
 - ra. Sahanan pamutus wicara sane katiwakang.
- (2) Parindikan kadi kecap wiwit (1) patut katampenin, katimbangan saha katiwakin pamutus antuk paruman inucap.
- (3) Sangkepan sekaa-sekaa sane pacang ngardi pamutus, patut matur supeksa ring Prajuru Desa mangda tan lempas ring patitis lan pamikukuh Desa Pakraman.

Pawos 19

- (1) Tata-titi sangkepan utawi paruman luire :
- ha. Macihna antuk suaran kulkul manut pawos 15 wiwit (5),
 - na. Sahanaing krama sane pacang nyarengin patut mabusanaadat madya,

- ca. Tan kalugra makta saluiring gegawan,
- ra. Tan kalugra ngawetuang suara bangras utawi biota ring sangkepan lan paruman.

(2) Dudonan pamargin paruman luire :

- ha. Paruman patgatakala kamanggala antuk arah-arang muang suaran kulkul, paruman ngasasih nenten ngamargiang arah-arang wantah kamanggala antuk suaran kulkul
- na. Prasida kamargiang risampune katedunin antuk satenga langkung saking pigungan krama sami,
- ca. Kakawitin antuk pangarcana ring Ida Bhagawan Panyarikan masedana antuk Cane kalanturang antuk macak krama,
- ka. Nguncarang pengastungkara panganjali saking Bendesa Pakraman tur kasawurin antuk krama sami.

(3) Pamutus babawosan mangda kautsahayang majalaran antuk paras paros, gilik saguluk. Prade tan prasida, pawilangan suara sane akehan kasinanggeh pamutus.

(4) Prade sajeroning paruman paimdikan sane kabawosin tan prasida molihang pamutus, prajuru patut nanggehang paimdikan punika tur kabaosang malih ring paruman sane pacang rawuh.

(5) Sangkepan prajuru matetujon ;

- ha. Ngrincikang sahananing pangerencana sane pacang kamargiang
- na. Mawosin wicaraan krama sane kasadokan ring prajuru sadurung niwakang panepas majeng ring sang mawicara.

(6) Pamutus sangkepan prajuru durung kangkat kamargiang sadurung kasungkemin olih paruman krama, punapi malih sane marupa tategenan krama.

Palet 5
Indik Druwen Desa
Pawos 20

- (1) Sane kamanggehang pinaka druwen Desa Pakraman Sekar Pandan luire ;
 - ha. Kahyangan desa mekadi Pura Puseh, Pura Dalem, Lan Pura Desa, rauhing piranti-piranti sane wenten ring pura inucap
 - na. Tanah tegak pura Kahyangan Desa , Tegak bale desa muah telajakannya
 - ra. Tanah Setra lan Laba Pura sane wenten ring wewidangan Desa Pakraman Sekar Pandan
 - ka. Lelanguan, ilen-ilen, gong lan sakaluirnya sane sampun mungguh ring ilikita
 - da. Tanah Pakarangan Desa
 - ta. Druwen desa siyosan sane kapikolihang kapungkur wekas.
- (2) Sahananing druwen desa patut kaunggahang ring ilikita sane pastika tur kadambiakang nyabran sangkepan krama.
- (3) Sahananing krama patut sareng ngelingang sakancan druwen desa kadi mungguh ring ilikita.
- (4) Tanah PKD kapidabdabin olih Desa Pakraman.

Pawos 21

- (1) Prade wenten sinalih tunggil krama utawi warga desa memandung druwen desa, patut katiwakin pamidanda manut pararem tur ngewaliang sekancan barang sane kapandung.
- (2) Prade barang sane kapandung punika sinanggeh barang sane suci, patut pamidandannya kawewehin antuk pamrayascita manut kabuatan sane kaputusan sajeroning pararem.
- (3) Prade wenten druwen desa utawi pura ical tur tan wenten krama sane ngangken ngambil, wenang kramane sami katiwakin padewasaksian.

- (4) Prade rikala ngemargiang padewasaksian wenten krama tan praside rawuh, patut matur piuning ring prajuru. Prajuru patut maritetes tur niwakang pamutus indik kawentenananipun.

Palet 6
Sukerta Pamitegep
Kaping 1
Karang lan Tegal

Pawos 22

- (1) Sahananing Karang desa muang tanah tegak paumahan, patut mangda wenten wates ipun sane pastika sanistan ipun antuk papagehan.
- (2) Karang utawi tanah paumahan sane masanding, mungguing wates ipun kapidabdabin sekadi ring sor :
- ha. Wates sisi kaler, sisi kangin miwah sane nepi ring rurung utawi margi kekaryanin antuk sang ngamong karang inucap
- na. Wates sisi kelod utawi sisi kauh sajawaning sane nepi ring rurung utawi margi kakaryanin olih sang ngenahin karang panyanding sane delodan utawi dauhan
- ca. Prade sangkaning pada lila, kangkat kawentenang pamargi siyos kecap ring ajeng.
- (3) Prade wenten tegak karang paumahan sane kabebeng patut kautsahayang wenten pajalannya karurung utawi margine sanistanya apapaga sawatara adepa agung malarapan antuk paras – paros sareng panyandingnya, utawi nunas pamutus ring Prajuru.

Pawos 23

- (1) Sapa sira ugi tan kapatutang malaksana sakadi ring sor :
- ha. Ngalahlah tegal wiadin Karang druwen anak siyosan, sajawaning wenten panguwak saking sang nrebenang;

na. Ngalahlah margi, rurung tegak setra muang sekancan tegak sane kasinanggeh suci siyosan.

(2) Sang mamurug kecap wiwit (1), prade wenten ngawicarayang patut kapidabdabin :

ha. Ngawaliang tanah sane kalahlah manut wates nyane rihin.

na. Pamidanda panguak manut pararem

ca. Upacara panyangaskara, prade genah sane kalahlah punika marupa genah sane kasinanggeh suci.

Pawos 24

(1) Sahanan warga Desa Pakraman Sekar Pandan patut miara karesikan pakarangan muang telajakannya, rauh ring margi utawi rurung manut tatiwak saking prajuru.

(2) Sajeroning usaha ngrajegang karesikan wewengkon Desa Pakraman Sekar Pandan sowang-sowang pakarangan kaaptiang mangda :

ha. Wenten blumbang genah luhu

na. Maduwe WC

ca. Prade mekarya kandang bawi sajeroning pakarangan mangda ugi kejangkepin antuk waduk utawi blumbang genah kotoran ipun

ra. Tan kadadosang makarya genah ngutang kotoran ring tepining margi utawi rurung.

(3) Sang mamurug wiwit (2) aksara ca lan ra, patut katiwakin pamidanda manut pararem.

(4) Krama wiadin warga desa sane madrebe tegal, kaaptiang mangda mastikayang padrebeannya antuk ilikita marupa sertifikat saking guru wisesa.

Kaping 2

Kakayonan

Pawos 25

- (1) Sapa sire ugi ngawit pacang nandur tanem tuwuh sane pacang dados mageng sajeroning pakarangan, patut paembangnya saking wates karang tan kirang ring adepa agung.
- (2) Tanem tuwuh sane ngarebrebin utawi kasumangsayain pacang nyengkalen kapisaga kengin kawara madasar antuk paigum sane becik, mangda tanem tuwuh punika gelis karebah utawi katebtebin.
- (3) Prade sampun kawara kadi wiwit (2) sang maduwe tan satinut utawi nenten nagingin pinunas sang ngawara, sang ngawara kengin nyadokan ring prajuru nunas pamutus.
- (4) Prajuru desa wenang mratiayaksayang saha maweh panyepat pamutus arep ring sang madrebe tanem tuwuh, mangda tanem tuwuh sane kawara digelis karebah utawi katebtebin.
- (5) Sang mamurug wiwit (4) keni pamidanda manut pararem.

Kaping 3

Indik Wawangunan

Pawos 26

- (1) Sapa sira ugi pacang makarya wawangunan, tan kapatutang nyapcap kapisaga.
- (2) Wewangunan sane sampun wenten, sane kanton nyapcap ka pisaga, mangda kautsahayang ngaryanang abangan sepatutnya.
- (3) Sapa sira ugi tan tinut ring wiwit (1) lan wiwit (2), risampune wenten pasadok ring prajuru wenang kaicen tatepasan kadasarin antuk paras paros. Prade tatiwak saking prajuru taler tan katinutin kangkat wicara punika kaaturang ring sang wenang rumawos tur sang mamurug awig-awig kakeninin pamidanada manut pararem.

Pawos 27

- (1) Wawangunan desa patut kawangun ring tanah druwen desa saha kaprabeyanin olih krama desa.
- (2) Sekaa ring wewidangan Desa Pakraman Sekar Pandan tan kawenang ngewangun pengayengan Kahyangan Desa.

Kaping 4

Indik Wawalungan

Pawos 28

- (1) Krama wiadin warga desa sane miara wawalungan patut sayaga nitenin wawalungan makadi negul utawi ngelogor, mangda tan jantos ngarusak karang, pabianan, punapi malih jantos ngaletihin kahyangan.
- (2) Prade wenten wawalungan ngeleb jantos ngarusak pabianan utawi pakarangan, risampune nahen kaplungguhang taler tan katinutin, kengin kataban tur kasadokang ring prajuru. Prajuru patut niwakang pamidanda manut pararem.
- (3) Prade wawalungan inucap jantos ngaletihin genah suci, sajawaning pamidanda kadi munggah ring wiwit (2) taler kawewehin antuk pamidanda pangupakara kahyangan inucap manut kabuatan.
- (4) Sapa sira ugi tan kadadosang ngejuk lan ngemademan sarwa paksi ring wawengkon Desa Pakraman Sekar Pandan.
- (5) Sang mamurug wiwit (4) keni pamidanda manut pararem.

Pawos 29

- (1) Tan kadadosang ngangonang utawi negulang wawalungan ring margi, rurung, setra, pakarangan banjar utawi desa miwah telajakannya.
- (2) Sowang-sowang kulawarga patut nitenin saha ngupapira asunnya mangda nenten nyengkalen.

Pawos 30

- (1) Tan kalugra ngalumbar ayam ritatkala warga desa ngawit matanduran utawi matajuk mawaneng 15 (limolas) rahina sakeng ngawit nandur.
- (2) Sang madrebe tegal pabianan patut masedok ring sang madrebe ayam malumbar ritatkala jagi ngawitin matanduran.
- (3) Prade risampun masadok, taler kantun wenten ayam malumbar, kengin sang madrebe pabianan ngejuk ayam inucap tur nyadokang ring prajuru desa utawi banjar. Prajuru patut niwakang pamutus utawi pamidanda manut pararem.

Kaping 5

Indik Bhaya lan Dusta

Pawos 31

- (1) Sahananing laksana tan rahayu sane ngawinang pikobet, duhkita, duskerta ring Warga siyosan kasinanggeh bhaya.
- (2) Bacakan sane kabawos bhaya luire :

ha.	Jiwa bhaya	:	kaamuk, kabaak, lan kaparikosa
na.	Artha bhaya	:	kamalingan, kabegalan
ca.	Geni bhaya	:	katunuan utawi puun
ra.	Toya bhaya	:	anyud katiben arus
ka.	Bhayu bhaya	:	katiben linus
da.	Chora bhaya	:	sahanan parilaksanan sane ngawetuang pikobet anak siyosan.

Pawos 32

- (1) Warga desa sane katiben bhaya patut digelis matur supeksa ring prajuru utawi sang wenang maosin
- (2) Sang katiben bhaya utawi sang manggihin kawentenanan bhaya patut nyuarayang kulkul manut wigunannya saha digelis matur supeksa ring prajuru mangda sang katiben bhaya gelis polih pitulung.
- (3) Sahanan warga desa patut sayaga maweh pitulung saha makta piranti manut kawentenanan bhaya inucap.

Pawos 33

- (1) Sang kamalingan prade pacang ngamargiang masaserep patut nunas panguak saking prajuru.
- (2) Masaserep sios bebanjuran utawi desa patut polih panguwak saking prajuru sane ngawidangin genahe masaserep.
- (3) Prajuru patut nganter sang masaserep mangda tan jantos ngawetuang biota.

Pawos 34

- (1) Sahanan Warga malaksana dusta ngawinang bhaya taler kangkat katur ring guru wisesa manut bobot kaiwangannya.
- (2) Prade dusta ngawinang kaletehan genah sane kasinanggeh suci, wenang pamidandanya kawewehin antuk pamrayascita manut kabuatan.
- (3) Sang malaksana dura cara ring agama, prade kacihna manut tri pramana (saksi, bukti, ilikita), patut katiwakin pamidanda manut pararem.
- (4) Yan wenten warga desa melaksana duskerti astha capala, pada capala, wak capala, ring warga siyosan yaning kawicarayang tur prasiada kabuktiang, sang melaksana patut keni pamidanda manut pararem.
- (5) Prade laksana inucap nibenin warga sane kapinggihang manut agama, patut pamidandannya kawewehin pamrayascita marep ring katiben manut kabuatan.

- (6) Prade ring sangkepan utawi ring pura wenten Warga nguman-uman wiadin kroda, patut katiwakin pamidanda saha pamrayascita manut pararem.
- (7) Prade wenten dusta saking dura desa, patut kaejuk katur ring Guru Wisesa.

Kaping 6
Pangunyan Desa

Pawos 35

- (1) Rikala wenten krama desa ngawangun karya utawi yadnya patut polih penyanggra utawi pangrombo saking krama desa manut pinunas sang mayadnya.
- (2) Payembrama utawi pisuguh ring krama desa rikala mapitulung kamargiang manut drestha.
- (3) Sajawaning pamargi panyanggra utawi pangunyan manut drestha, krama sane madrebe lelanguan kengin ngaturang tatangguran santukan rumasa pinaka tangan sukuning desa.

CATURTHAS SARGAH
SUKERTA TATA AGAMA

Palet 1
Indik Dewa Yadnya

Pawos 36

- (1) Pura-pura sane wenten ring Desa Pakraman Sekar Pandan luire :
- ha. Pura Kahyangan Tiga, makadi Puseh, Dalem, Bale Agung utawi Pura Desa
- na. Pura-pura merajan utawi pajenengan.
- (2) Pura Kahyangan tiga kasungsung lan kaempon olih krama Desa Pakraman Sekar Pandan .

- (3) Pura merajan utawi pajenengan kasungsi olih pangemponnya sowang-sowang.
- (4) Piodalan ring pura-pura inucap kalaksanayang nyabran 6 sasih apisan manut drestha sowang-sowang.

Pawos 37

- (1) Ring sowang-sowang pura patut kaadegang Pamangku sane yogya ngenterang nuntun utawi ngastawayang sahanan yadnya ring pura inucap.
- (2) Gaguat nyudi dados pamangku luire :
 - ha. Krama desa Pakraman ngarep utawi sane sampun nyada.
 - na. Tan cendangga banget.
 - ca. Maparisolah sane rahayu
 - ra. Uning nyurat tur ngwacen sastra agama
- (3) Tata cara ngadegang Pamangku ;
 - ha. Madasar katurunan saking Pamangku sane rihinan
 - na. Malarapan antuk nyanjan utawi kacatri
 - ca. Saking sasudian
- (4) Dudonan ngadegang Pamangku luire :
 - ha. Kararemin pacang dados Pamangku
 - na. Nunas wara nugraha ring pura malarapan pawintenana
 - ca. Nyuciang raga utawi mawinten kapuput olih Sulinggih
- (5) Sane tan wenang dados Pamangku luire :
 - ha. Warga cedangga banget
 - na. Warga sane maparisolah tan rahayu
 - ca. Sang tan kararemin antuk krama
- (6) Sang kasudi dados Pamangku riwus puput pawintenannya patut ngamargiang darma kapamungkuan. tur patut kasinggihang olih warga desa manut swadarmanya .

Pawos 38

Swadarmaning Pamangku luwire :

- ha. Asewaka darma, astiti bakti ring Ida Sanghyang Widhi Wasa, utamannya ring Ida Bhatara susuhunan
- na. Ngenterang, ngastawayang sahananing upacara rikala patirtan utawi yadnya siyosan ring pura .
- ca. Ngastawayang rikala wenten krama ngaturang punia , punagi mapanauran ,utawi nunas karahajengan ring pura .
- ra. Ngelaksanayang pamargi sane mabuat suci ring pura, pamekas rikala nedunang utawi ngelinggihang pralingga Ida Bhatara.
- ka. Nuntun krama lan warga desa mangda setata bakti ring Ida Sanghyang Widhi tur melaksana susila manut agama.
- da. Nyiratang tirta majeng ring krama utawi warga sane kasinanggeh patut.

Pawos 39

- (1) Sahananing aturan utawi sesangi marupa artha, laluwesane, mule-mule muah sakaluirnya patut kadruwenang antuk pura inucap.
- (2) Sang pacang maturan, mapanauran ring Kahyangan Desa patut masadok ring prajuru mangda kaungguhang ring ilikita sasampune kaastawayang olih Pamangku.
- (3) Sekancan aturan ring ajeng wenang kaanggen ring pura manut tatujon.
- (4) Sahanan sarin canang ring kahyangan tiga patut kepah tiga, apah tiga katur ring Pura, apah tiga ring Desa miwah apah tiga ring Jro Mangku.

Pawos 40

- (1) Pamangku kagentosin malarapan antuk :
ha. Seda
na. Sangkaning pinunas ngraga kasungkeming ring paruman ca. Kanorayang
olih krama riantukan malaksana dusta
- (2) Prade Jro Mangku kawusanang sangkaning melaksana dusta patut Pamangku
inucap ngawaliang sahananing piranti kapamangkuan druwen desa sane
karaksa.
- (3) Prade Jro Mangku malih ngalap rabi sangkaning rahayu, patut Pamangku
inucap malih nyepuh raga tur katodya olih prajuru sahananing prabeyannya
kamedalang olih Pamangku inucap.
- (4) Prade Jro Mangku Kahyangan Desa seda, patut kamargiang upacara
pangabenan, karombo saha kaprabeanin olih krama desa.

Pawos 41

- (1) Kahyangan kasinanggeh kadurmanggalan prade :
ha. Katiben Bhaya
na. Kapandangan
ca. Karubuhan taru
ra. Sander kilap
ka. Kahanan lulut sakaluirnya
da. Kahanan wangken jadma utawi wangken sato ageng
ta. Dados genah Warga masanggama
- (2) Kasukertan Kahyangan kapidabdabin sakadi ring sor :
ha. Sahanan krama lan warga desa patut nureksa, nyaga, mangda kasukertan
Kahyangan tan kaletahan.
na. Sane tan kalugra ngranjing ka pura luire :

1. Sang kantun sebel ring raga manut jalarannya.
2. Sang kantun cuntaka sangkaning madrebe kulawarga seda, manut sengker.
3. Warga sane sinanggih patita makadi : panak babinjat, beling tan wenten ngankenin, tan kasinangaskara, Warga buduh, sakit ila, muang sakancan cendala siyosan sadurung polih pamrayascita manut sastra agama.
4. Sato ageng sajawaning rikala mapepada
5. Sang mabusana tan manut ring tata susila ngranjing kapura
6. Sang makta saluiring barang sane kabaos letih manut agama
7. Sahanan sane kabaos ngaletihin manut pararem.

ca. Pratingkah sane tan kawenangang ring pura luire :

1. Masumpah utawi nahap cor, sajawaning saking pituduh Prajuru.
 2. Maulah ala, maujar ala wak parusia
 3. Marebat, mayuda, punapi malih jantos wenten ngamedalang rah
 4. Mecikan wastra, nyangsang busana, mecikan pusungan lan sapanunggilannya sajawaning sulinggih lan pragina
 5. Mawarih, makoratan, macecepin anak alit
 6. Masanggama.
- (3) Yan mabukti wenten Warga melaksana ngaletihin sakadi wiwit (2) aksara ca patut keni pamidanda manut pararem. Saha kawewehin antuk pemrayascita manut kabuatan.
- (4) Prade wenten Kahyangan Desa keni kadurmanggalan, Pamangku utawi sang manggihin patut digelis nyadokan ring prajuru mangda marumang krama pacang ngawentenang pangupakara sapatutnya.
- (5) Prade wenten Warga buduh jantos ngarusak pura. ingih punika palinggih utawi sane siyosan kapatutannya patut mecikang sahanan sane karusak tur keni pamrayascita.

Palet 2
Indik Resi Yadnya
Pawos 42

Indik Resi Yadnya ring Desa Pakraman Sekar Pandan kamargiang manut sukerta sastra agama.

Palet 3
Indik Pitra Yadnya
Pawos 43

- (1) Sahananing upacara pamretekana sawa kabawos Pitra Yadnya.
- (2) Prade wenten warga utawi krama desa seda, kangkat ngambil pamargi kadi ring sor.
 - ha. Kapendem manut drestha
 - na. Mangkingsan ring geni lan ring toya, prade pacang kaabenang sadurung tutug tahunan.
 - ca. Ngraris kaabenang manut uger – uger padewasan.

Pawos 44

- (1) Gaguat mendem sawa luire :
 - ha. Genah mendem utawi ngeseng ugi mangda ring setra, yan rare sadurung ketus untu wantah ring setra bajangan
 - na. Yan rare durung ketus untu sane seda, wenang kapendem pramangkin tan ngawilang dewasa, nanging yan sampun ketus untu patut nganutin padewasan
- (2) Padewasan mendem kapidabdabin olih Prajuru Desa.
- (3) Tan kawenang mendem sawa rikala rahina : Pasah. Purnama. Tilem. Semut sedulur. mwanng Kala Gotongan mwanng rerahinan siyosan manut pararem.

Pawos 45

- (1) Prade wenten warga desa seda rikala wenten wali ring sinalih tunggil Paibon, lan Kahyangan Desa , wawu kangkat kapendem riwus pujawaline puput kamargiang yadiastun durung panyineban sakewanten pamargi mendem sasiliban,tan nganggen gagumuk miwah upakarannya kamargiang risampune puput panyineban.
- (2) Prade nuju karya ring Kahyangan Jagat sawewidangan Nusa Penida, wenten warga desa seda, kangkat mendem premangkin, nanging pamargine sasiliban tur tan nganggen gegumuk. Pamretek sepatuting pamendeman wenang kamargiang risampun Karya inucap puput tur manut padewasan.
- (3) Prade wenten warga desa seda rikala wenten yadnya ring Kahyangan Jagat luaring kecamatan Nusa Penida, pamargine mendem utawi mrateka sang lampus kalaksanayang nganutin piteket saking Parisada utawi Guru wisesa.

Pawos 46

- (1) Krama utawi warga desa sane seda sangkaning salah pati, ulah pati, kengin kabakta budal, nanging patut kasanggara antuk banten pangulapan muang panebusan, pamretekannya kamargiang sakadi patut
- (2) Tan kawenangang mendem sawa sane makta bobotan sadurung bobotannya kaembasang.
- (3) Prade wenten Warga siyosan desa seda ring wawengkon Desa Pakraman Sekar Pandan, sawannya kaatur ring guru wisesa,pamrayascita miwah pacaruan kalaksanayang olih desa pakraman.
- (4) Prade wenten warga desa seda ring tegalan, kapatutanya patut nglaksanayang pamrayascita pacaruan sanistanya amanca warna, kalaksanayang ring genah inucap mawaneng sedurung asasih pitung rahina.

Pawos 47

(1) Swadharmaning krama lan prajuru rikala wenten kalayusekaran :

ha. Krama sane kalayusekaran :

1. Patut digelis masadok ring kelihan banjar, saha nunas tatimbang mungguing kawentenanya.
2. Nunas pangrembo ring krama banjar, manut kabuatan
3. Ngaturang panyembrama pisuguh saka sidan majeng ring krama sane rawuh ngrombo karya manut drestha.

na. Prajuru Pakraman sasampune polih pasadok, patut :

1. Maritatas tatujon pamargin sang kaduhkitan.
2. Nyuarayang kulkul manut tatujon, raris ngenter pamargin krama sajeroning ngrombo karya wiadin pamargin patus manut drestha.

ca. Krama Banjar patut :

1. Ngrombo sang kalayusekaran sepatutnya manut drestha.
2. Maweh patus saha ayah-ayah manut pidabdab sane sampun kararemin.

(2). Rikala nyandang utawi nanggung sawa, wadah muang upakara sane siyosan, pamargine ka setra patut mangda dabdab tan kadadosang magarap-garapan jantos ngawinang pikobet sang madruwe yadnya.

(3). Rikala nyangra upacara krama sane seda pacang kapendem utawi kaabenang, krama Banjar wiadin Desa patut nganggen busana adat madya, tur tan kapatutang mabungah bungahan.

Pawos 48

(1) Sang kasinanggeh cuntaka luire :

ha. Sang kalayusekaran

- na. Sang nyambut karya pitra yadnya, ngawit nanceb taring .
- (2) Sengker sebel miwah cuntaka manut jalarannya sekadi ring sor :
- ha. Ngeraja jantos wusan ngamedalang rah tur mersihin raga
- na. Ngembasang oka, sane istri 42 (petang dasa kalih) rahina, sane lanang 12 (roras) rahina
- ca. Karuron, kulewargannya sape Sekar Pandan jantos 42 (Petang dasa kalih) rahina, nanging kulewarga warisnya siyosan saking Desa Pakraman Sekar Pandan wantah 3 (tigang) rahina.
- ra. Sangkaning kalayusekaran, sang ngarepin jantos puput ngetelunin (nigung rahinanin).
- ka. Yening sane seda anak alit durung kepus pungsed, kulewargannya sape Sekar Pandan manggeh cuntaka jantos 42 rahina.
- (2) Prade wenten krama wiadin warga desa seda rikala sampun nyambutang karya utawi yadnya ring kahyangan tiga, sane wenang nyuntakayang wantah sang ngarepin sareng pengapitnya kemawon.
- (3) Sane kamanggehang tan keneng cuntaka luire :
- ha. Ida Sang Sulinggih
- na. Pamangku Kahyangan Desa

Pawos 49

- (1) Sawa sane patut kaabenang wantah sawa sang sampun akupak utawi sampun maketus untu. yening durung akupak kawenangang wantah ngelungah.
- (2) Krama sane pacang ngemargiang ngaben kapatutang mangda nuduk patus desa.

Pawos 50

- (1) Ayah-ayahan patus rikala wenten ngaben luire :
ha. Ngaresikin utawi ngabas margi rauh ka setra
na. Ngaryanin rarompok mwang tataring
ca. Ngaryanin tatakan api utawi prapen
ra. Ngaryanin bale pawedan
ka. Ngaryanin wadah muang eteh-ete siyosan
da. Ngrombo karya jantos puput nganyut
ta. Karya siyosan manut paigum lan pangenter Prajuru.

Pawos 51

- (1) Krama sane pacang nampi patempung ngabenang sawa saking desa siyosan, patut masadok dumun ring prajuru sadurung ngawit ngambilang karya.
- (2) Prade patempung inucap kalugra olih Prajuru, sang matempung kapatutang nawur pakenan-kenan ke Desa luir ipun: Panukun setra, Pananjung batu, muang pangungkab lawang akehnya manut pararem
- (3) Sahananing aturan ring Pura sane mawit saking pangungkab lawang, panukun setra, pananjung batu, panebas atma, manggeh dados druwen desa tur patut kaunggahang ring ilikita
- (4) Pemangku ring pura dalem patut polih pahpahan aturan inucap manut pararem.

Palet 4

Indik Manusa Yadnya

Pawos 52

- (1) Manusa Yadnya inggih punika upacara darmaning manusa ngawit saking patemuning kama bang kelawan kama petak sajeroning garba wasananing ibu ngantos seda riwekas

- (2) Upacara lan upakara ring wiwit (1) kalaksanayang nganutin pamargi Kanista, Madya lan Utama, saha kapidabdabin manut dresta.
- (3) Upacara inucap kamargiang manut kecap sastra agama muang drestha sane kamanggehang ring Desa Pakraman Sekar Pandan.

Palet 5

Indik Buta Yadnya

Pawos 53

- (1) Bhuta Yadnya Inggih punika sahanan upacara yadnya sane matetujon nyomiahang Butha, Kala, Durga Bucari menados Butha, Kala Durga Bucari Hitha.
- (2) Upacara-upakara pabiakalan ring sarwa prani luire ;
 ha. Ring sarwa tumuwuh, nemonin tumpek wariga
 na. Ring sarwa prani utawi ingon-ingon, nemonin rahina Tumpek Uye.
- (3) Upacara pabeyakalan ring pertiwi, Kahyangan lan sarwa Bhutakala kabaos caru luire :
 ha. Yadnya sesa
 na. Segehan
 ca. Caru Eka sata;
 ra. Caru manca sata;
 ka. Caru manca sanak;
 da. Caru manca kelud
 ta. Rsigana;
 sa. Balik sumpah, Tawur Agung lan sapenunggilannya
- (4) Sejaba Upacara Bhuta Yadnya kadi kecap ring ajeng, taler kamargiang upacara pabeyakalan ring manusa manut wiguna.

Pawos 54

- (1) Rikala Tileming sasih Kasanga, ring wawidangan Desa Pakraman Sekar Pandan taler kamargiang Bhuta Yadnya pacaruan sakadi ring sor :
 - ha. Ring Pempatan Desa Caru Manca Sata;
 - na. Ring Pura Paibon, Kahyangan Desa manut drestha kamargiang caru eka sata;
 - ca. Ring sowang-sowang paumahan utawi pakarangan upakarannia nganutin pituduh Guru Wisesa
- (2) Sorenya kamargiang Pangrupukan pabuu-buu, kapidabdabin olih Prajuru sane karombo olih Pacalang, ngawit sandikawon tan kengin lintang ring tengah wengi.
- (3) Benjangnya kamargiang catur brata panyepian luih ipun;
 - ha. Amati geni;
 - na. Amati karya ;
 - ca. Amati lalungan;
 - ra. Amati lalangan;
- (4) Pamargin Bhrata panyepian katuntun olih Prajuru manut desa kala patra, tur ngawit brata inucap kacihnayang antuk suaran kulkul.

PANCAMAS SARGAH SUKERTA TATA PAWONGAN

Palet 1 Indik Pawiwahan

Pawos 55

- (1) Pawiwahan inggih punika panungilan purusa lan pradana malarapan suka cita kadulurin antuk upasaksi sakala lan niskala

- (2) Pidabdab pawiwahan sane kapatutang ring Desa Pakraman Sekar Pandan luire;
ha. Papadikan
na. Ngerorod utawi ngrangkat
ca. Nyeburin
- (3) Pamargin papadikan madudonan sekadi ring sor
ha. Pamargi ping tiga luire
1. Pasewakan
2. Pangambilan (Pawiwahan)
3. Pangunyan maduluran banten pejati katur ka Sanggah utawi merajan wadone.
na. Prade sampun pada tulus tur sami anut, kulawarga sang wadon raris masadok ring prajuru desa rikala pamargi pangambilane.
- (4) Pamargi ngerorod utawi ngrangkat kapidabdabin sekadi ring sor :
ha. Kulawargan sang lanang patut ngawentenang pasadok antuk duta sanistanya kalih diri tan kasepan ring awengi saha masarana suar.
na. Sasampune pasadoke katrima olih kulawarga sang wadon kulawarga sang lanang raris masadok ring prajuru Desa pacang nunas upasaksi lan swaran kulkul.
ca. Ngawentenang pangeros utawi pangrawos sasampune masengker tigang rahina, saha maduluran sedah, jambe, gambir, seseban, lanjaran, apuh lan tubungan, tur madaging sekar matatakan dulang, sane kaantebang olih jro Mangku.
ra. Daging pangrawos utawi pamelaku sekadi ring sor
1. Kamanggala antuk geng pangampura arep ring reraman wadone
2. Ngigumang bawos indik pamargi padewasan pawidi-widanannya .
ka. Riwus pangambilan, wargan sang istri patut masadok ring Prajuru. Prajuru raris nyuwarayang tengeran kulkul makecihna pamargin rangkate sampun katrima.

- da. Risampune puput upacara pawidhiwidanannya tur kasaksiang olih Prajuru, kawentenang pasewakan malarapan antuk ketipat bantal lan sanganan kalaudan miwah sakancanipun, kasarengin olih kulawarga lanang istri tur kasaksiang olih prajuru.
- (5) Prade pelaku utawi pasadoke tan katrima olih kulawarga sang istri, kulawarga lanange patut nyadokang ring prajuru saha prajuru raris mawosin saha ngicen pamutus manut kawentenannya.
 - (6) Prade wenten Warga saking dura desa ngarorod ring sajeroning Desa Pakraman Sekar Pandan, krama sane nampi patut digelis masadok ring prajuru. Prajuru raris maritatas kawentenan sang ngarorod inucap, prade pamargine sampun manut patut polih pasayuban, yan tan manut tan patut polih pasayuban.
 - (7) Pawiwahan nyeburin inggih punika : sane lanang manggeh pinaka pradana ,sane istri manggeh pinaka purusa kabawos sentana rajeg.
 - (8) Dudonan pamargi nyeburin inggih punika kulawargan wadone ngemargiang pepadikan majeng ring kulawarga lanang tur upakara pawidhiwidanaan kalaksanaayang ring genah sang wadon kadulurin upakara pameraasan.

Pawos 56

Pidabdab sang pacang mawiwaha sakadi ring sor

ha. Sampun munggah daha teruna

na. Sangkaning pada rena

ca. Manut kecaping agama

ra. Yan ngambil siyos agama patut kamanggala antuk banten Sudhi wadhani.

ka. Mangda nganutin pidaging undang-undang perkawinan

Pawos 57

- (1) Pawiwahan sane kapatutang ring Desa Pakraman Sekar Pandan luire :
- ha. Sampun kamargiang pabeyakalaan saha kaupasaksi sakala niskala tur kapuputang antuk pandita utawi pinandita.
 - na. Wenten upasaksi saking prajuru desa.
 - ca. Sampun matengeran suaran kulkul
 - ra. Sampun kailikitayang
- (2) Pawiwahan sane tan manut sakadi ring wiwit (1) nenten kabawos patut.

Pawos 58

Sapasira ugi pacang ngawarangan kulawargannyane patut masadok ring prajuru indik pamargin pawarangane.

Pawos 59

Prade wenten sinalih tunggil krama desa Pakraman kaicalan oka istri, patut ngamargiang pasaserep tur kapidabdabin sakadi ring sor :

- ha. Sang pacang masaserep patut masadok rihin tur nunas panuntun ring prajuru desa.
- na. Sang masaserep patut ninutin pituduh prajuru luire :
 - 1. Pacang ngranjing kaumah krama siyosan tan dados langkung ring kalih diri.
 - 2. Tan kengin makta saluwiring gegawan.
 - 3. Tan kengin maparilaksana lan mabaos sane tan patut.
- ca. Prajuru patut mapidabdabin pamargin sang masaserep mangda saserepe trepti saha anak istri inucap polih nguningayang paindikan ipun. Pidabdab pamaritatas kamanggehang sekadi ring sor :

1. Anake istri manggda magenah ring genahe sane galang, kirang ring tigang depa tan kalugra anak siyos nganampekin, tatujone mangda tan kemad ngaturang paimdikannyane ring sang maritatas.
 2. Prajuru desa marityaksayang pangangken sang istri rikala pacang nibakang pamutus. prade pada arsa sang ngarorod, saserepe patut matulak. prade sangkaning kapaksa, sang lanang patut katiwakin pamidanda manut pararem tur sang istri kapalasang saking genah inucap.
- ra. Prade masaserep ring desa Pakraman siosan patut polih wak-wakan saking prajuru genahe masaserep.

Pawos 60

Prade wenten anak istri deha mobot , patut kapidabdabin sakadi ring sor :

- ha. prade sane lanang nangken madrebe pakardine tur kanton truna, kautsahayang mangda prasida mawiwaha.
- na. Prade sang lanang tan suka ngambil sang istri sane mobot punika, sang lanang patut keni pamidanda manut pararem. Pamargi selantur ipun katur ring guru wisesa. Risampune rarene embas patut kaprateka miwah kaupapira manut agama olih sang istri.
- ca. prade sang lanang sampun alaki rabi ngangken madrebe bobotane, tur anake lanang sanggup pacang ngambil sang mobot. pinih rihin patut polih wak-wakan saking rabine sane rihinan tur polih ijin saking Pengadilan Negeri.
- ra. Risampune ngemargiang pawiwahan sakadi patut tur rarene sane embas patut kaupapira sakadi patut.

ka. Prade sang istri sane mobot paling pangangkene tur matujuang anak lanang sane kasenengin, nanging sang kadalih nenten ngangkenin indike punika, patut kamargiang padewasaksian, tur prabeyannyane kamedalang antuk sang sane mobot. Risampune rarene embas patut kapahayu sapula-pali olih sang istri manut agama, tur keni pamidanda manut pararem

Pawos 61

Sahananing krama sane sampun alakirabi, prade wenten riyet ring parabiannyane, sang istri raris ngambul ka umah nyane pecak utawi umah anak siyosan jantos 6 sasih suwen nyane, yan sang istri wenten kayun pacang ngarorod malih, pamargine sakadi ring sor ;

ha. Patut pamargi nyapian nyane kapuputang dumun.

na. Pamargi parabiane mawali nganutin pawos 57 ring ajeng .

Palet 2

Indik Nyapihan

Pawos 62

- (1) Pawiwahan kabawos palas malarapan antuk nyapian utawi sinalih tunggil seda
- (2) Palas marabian utawi sinalih tunggil seda mapiteges balu lanang utawi istri.
- (3) Palas marabian mawiwit antuk wicara kabawos nyapian.
- (4) Pamargi nyapian kasinanggeh pastika ring desa Pakraman risampune;
ha. Molihang kaputusan saking Pangadilan Negeri.
na. Kadambyakang olih prajuru sajeroning paruman.

Pawos 63

Krama sane nyapian kapidabdabin sakadi ring sor :

- ha. Sang ngawara keni prabea paruman manut paruman, prade pada arsa prabea paruman katawur olih lanang lan istri, akehnya manut pararem.
- na. Polih pah-pahan pagunakaya pada satanga utawi manut semayan ipun.
- ca. Pabekelan mawali ndiri-ndiri.
- ra. Warisan kakuasayang olih sang purusa.
- ka. Patut maweh pangupa jiwa muwang kaweruhan ring sentananya sane wetu saking parabiannya.

Pawos 64

Prade riwekas sang nyapian macihna adung malih tur arep mawiwaha kapatutang ;

- ha. Malih ngalaksanayang pawiwahan sakadi pawos 57
- na. Keni pamidanda manut pararem saha kadulurin banten pamrayascita.

Pawos 65

- (1) Balu luh sane katinggal lampus olih suaminnya, utawi balu sane pecak nyeburin, patut ngamargiang swadharmaning balu sakadi ring sor :
 - ha. Ngamargiang patibrata, tan paradara utawi dratikrama.
 - na. Ngraksa, ngutsahayang lan miara sahananing warisan lan pagunakaya, kalih sentanannya.
 - ca. Tan kengin ngadol. ngadeang. utawi makedihang warisan sajawaning polih panguwak saking kulawargan rabin nyane saking kapurusa.
- (2) Balu sane kabawos tan pageh ring swadharmaning balu luire ;
 - ha. Matingkah dratikrama. paradara lan sapanunggalannya.
 - na. Matilar tan pasadok jantos langkung ring 6 (nem) sasih.
 - ca. Lempas ring swadharmaning balu.

- (3) Balu sane tan pageh ring swadarmaning balu kadi kecap wiwit (2) prade kacihna manut tri pramana (bukti, ilikita, saksi) salah prawertine, wenang katundung olih kulawargan purusa.

Palet 3
Indik Sentana
Pawos 66

- (1) Sentana wenten kalih pawos sane kabawos pertisentana lan sentana paperasan.
- (2) Pertisentana inggih punika sentana sane metu saking pawiwahan sane kapatut.
- (3) Prade pawiwahan tan prasida ngewetuang sentana, kengin ngedih sentana kadulurin antuk upasaksi sakala niskala saha upakara pamerasan kawastanin sentana paperasan.
- (4) Prade wenten krama desa madrebe pianak lanang adiri tan dados kaperas.
- (5) Ngedih sentana manut kasujatian kahyun sang makarsa majalaran kahyun lulut asih, adung gilik-saguluk, kapungkur ipun jagi natak panes tis ritatkala sampun werda.

Pawos 67

- (1) Sang pacang meras sentana patut masadok ring Prajuru sanistanya asasih sadurungnya, tur patut ngawentenang pasadu arep ring kulawarga warisnya.
- (2) Bandesa Pakraman patut digelis nambyakang ring krama sajeroning paruman indik rencana sang pacang meras sentana.
- (3) prade wenten miyalangin mangda digelis nyadokang ring prajuru masenger tigang wuku sadurung paperasan kamargiang.
- (4) Bandesa Pakraman digelis mawosin saha ngicenin panuntun utawi panepas manut catur drestha miwah manut ring daging Awig-awig lan pararem desa.
- (5) Prade pidabdab pacang meras tan kapialang. upacara paperasan prasida kalaksanayang.

- (6) Prade wenten miyalangin manut sulur kecaping ajeng, prajuru patut ngandeg sang pacang meras. saha maweh panuntun mangda wenten babawosan sesanannya.
- (7) Meras sentana patut macihna antuk arthabrana paperasan saha kasaksiang antuk prajuru, warga lan waris tur kamanggehang ring ilikita olih prajuru.

Pawos 68

Paperasan patut kamargiang sakadi ring sor ;

- ha. Sane patut kaperas kaanggen sentana, kapertama waris kapurusa, yan tan wenten kengin saking wadon utawi tunggal sanggah, yan taler tan wenten kengin sapa sira ugi
- na. Upacara paperasan patut kasaksinin olih prajuru saha kapuputang antuk sulinggih.
- ca. Sasampun upacara paperasanne puput, prajuru desa patut nambyakang sajeroning paruman.

Pawos 69

- (1) Swadharmaning sang meras sentana patch sekadi swadharmaning guru rupaka luire :
 - ha. Maweh pangupajiwa
 - na. Ngupakara manut agama
 - ca. Maweh saha ngutsahayang kaweruhan
 - ra. Ngupadi karahajengan manut patitis grehasta lan sapanunggilannya.
- (2) Swadarmaning sentana paparasan patch sekadi swadharmaning pretisentana .
- (3) Sentana sane tan polih pangupapira sakadi wiwit (1) lan wiwit (2) patut digelis masadok ring prajuru. tur yan prasida kabuktiang sang malaksana keni pamidanda manut pararem.

Pawos 70

- (1) Sapesira ugi pacang ngerobang utawi ngajak warga saking kulawarga siyosan patut masadok rihin ring prajuru.

- (2) Krama sane ngajak utawi ngerobang patut sumakuta negenang saparilampah sang karobang arepe ring kasukertan Desa Pakraman.
- (3) Prajuru patut ngunggahang pasadok inucap ring ilikita saha nambyakang sajeroning paruman desa.

Palet 4

Indik Warisan

Pawos 71

- (1) Warisan inggih punika sahananing artabrana saha ayah-ayahan sajeroning ngupadi sukerta sakala niskala saking kaluhurannya arep ring katurunannya.
- (2) Sane kasinanggeh warisan luire :
 - ha. Druwe tengah turun temurun saking kaluhurannya, arta brana, sanggah pamerajan, tanah ayahan, pusaka lan sapanunggilannya.
 - na. Pagunakaya
 - ca. Hutang piutang
- (3) Wawu kengin kabawos warisan prade wenten :
 - ha. Sang mapiturun kabawos pewaris.
 - na. Katurunannya kabawos ahli waris
 - ca. Arthabrana miwah tategenan lan ayah-ayahan kabawos warisan

Pawos 72

- (1) Ahli waris luire :
 - ha. Preti sentana purusa
 - na. Preti sentana wadon sane kamanggehang sentana rajeg.
 - ca. Sentana paperasan.

- (2). Prade tan wenten sakadi inucap ring wiwit (1), sane kasinanggeh ahli waris :
- ha. Papernahan kapurusa ngunggahang makadi rerama, pekak, rerahe dimisan, dimindon lan selanturnyane.
 - na. Papernahan kasamping makadi misan, mindon, lan salanturnyane.

Pawos 73

Swadharmaning ahli waris sekadi ring sor :

- ha. Ngamargiang sahanan ayah-ayahan pewaris.
- na. Ngutsahayang arthabrana warisan.
- ca. Ngempon Kahyangan, marajan lan pura tatinggalan pewaris saha ngupakara.
- Ra. Ngelaksanayang sahanan pitra yadnyan leluhur.
- ka. Muputang utang piutang pewaris.

Pawos 74

- (1) Warisan wawu dados kepah olih para ahli waris risampun :
- ha. Muputang pitra yadnyan pewaris.
 - na. Naurin saluir utang pewaris
 - ca. Nyeledihi sahanan ayah-ayahan pewaris.
- (2) Prade sajeroning pakulawargan wenten pedum waris patut .
- ha. Kawentenang paigum indik pedum waris inucap.
 - na. Prade tan prasida, kengin nunas pamatut ring prajuru desa.
 - ca. Prade taler tan wenten cumpu ring pamutus prajuru desa, kengin kalanturang ring guru wisesa.
- (3) Sane tan patut polih pah-pahan warisan luire :
- ha. Sentana sane alpaka guru.
 - na. Sentana sane sampun nilar agama hindu.

- ca. Sentana lanang sampun kesah mawiwaha nyeburin.
- (4) Sane kapatut polih pah-pahan warisan pamupon luire :
 ha. Sang mulih deha, mulih truna lan deha tua
 na. Balu luh sane kantun ngamanggehang swadharmaning balu.
- (5) Pewaris duk kantun maurip kengin mapaweweh marep ring okane sane istri
 sane pacang kesah mawiwaha marupa :
 ha. Jiwadana utawi pabekel tetadtadan.
 na. Paweweh padgatakala.
 ca. Paweweh warisan siyosan yan sampun kalugra olih ahli waris sane wenten.

SADTHAS SARGAH WICARA LAN PAMIDANDA

Palet 1

Indik Wicara

Pawos 74

- (1) Sane wenang mawosin mutusang wicara ring Desa Pakraman Sekar Pandan inggih punika Prajuuru desa utawi Kertha Desa.
- (2) Parade wenten wicara tan prasida ngamolihang pamutus ring desa Pakraman sang mawicara kengin nunas pamutus ring sang rumawos utawi guru wisesa.

Pawos 75

- (1) Sahananing wicara sane mawiwit saking laksana corah sane kasinanggeh nungkas ring awig-awig utawi pararem, patut digelis kabawosin olih prajuru tan nyantos pasadok.

- (2) Sajawaning wicara kecaping ajeng, prajuru wenang mawosin risampune wenten pasadok saking sang nunas bawos.
- (3) Panepas saking prajuru patut pastika nyantenang iwang patut malarapan antuk Tri Pramana luire; saksi, ilikita, lan bukti, taler tan maren nepek ring catur drestha, makadi sastra drestha, purwa drestha, loka drestha muang desa drestha.

Palet 2
Indik Pamidanda
Pawos 76

- (1) Desa Pakraman wenang niwakang pamidanda ring warga desa sane sisip.
- (2) Patetiwak pamidanda inucap kamargiang olih Bandesa Pakraman sane ngawidangin.
- (3) Bacakan pamidanda luire :
 - ha. Ayahan panukun kasisipan
 - na. Danda arta marupa dedosan saha panikelnia miwah panikel urunan-urunan sane siyosan
 - ca. Rerampagan
 - ra. Kadaut tanah ayahannia
 - ka. Pamidanda siyosan manut pararem
- (4) Agung alit pamidanda sane katiwakang manut pangelokika kasisipannia
- (5) Sahanan jinah utawi arta brana pamidanda patut karanjingan dados druen Desa Pakraman Sekar Pandan

Pawos 77

- (1) Yan wenten sinalih tunggil krama langkung ring tigang paruman utawi tigang sangkepan tan naur paturunan utawi dedosan wenang kabligbagang manut pararem

- (2) Tata cara ngelaksanayang pangrampagan manut kadi ring sor
- ha. Kamanggala antuk pasadok, saking prajuru marep ring sang pacang karampag.
 - na. Ngrampag kelaksanayang olih prajuru, kasarengin olih krama pinaka saksi lan pangerembo pinih akeh 5 (lima diri)
 - ca. Sang ngrampag sangkaning darsana ngambil barang utawi nyawenin tanem tuwuh akehnian manut agung alit utang sang karampag.
 - ra. Sahananing sane karampag patut kauunggahang ring ilikita tur kasaksiang
 - ka. Prajuru patut miteketin sang karampag mangda digelis nebas sadurung waneng asasih.
 - da. Lelangan barang sane karampag kaanggen nuku utangnia ring desa Pakraman tur kawewehin antuk prabia pangrampagan, sisanian kawaliang ring sang karampag.
- (3) Tan kawenangan ngrampag barang sane kainggilang manut agama miwah sane mademang pangupa jiwa sang karampag.
- (4) Pamidanda kadi ring ajeng pastika purna buntas, yening sang sisip sampun :
- ha. Nunas geng sinampura ring krama sajeroning paruman, riantukan purun nguak pasubaya.
 - na. Naur pamidanda panguak pasuara duk pacang karampag.

SAPTAMAS SARGAH NGUWAH – NGUWUHIN AWIG – AWIG

Pawos 78

- (1) Nguwah – nguwuhin awig-awig puniki kalaksanayang antuk paruman Desa Pakraman Sekar Pandan
- (2) Paruman inucap patut kadasarin antuk gilik saguluk paigum pararem krama banjar
- (3) Pamutus bebaosan prasida kamanggehang yening sampun madasar antuk kayun gilik saguluk. Utawi madasar antuk pawilangan suara prade tan side gilik saguluk.

- (4) Prade pamutuse madasar antuk wilangan suara gaguatnia patut sekadi ring sor :

ha. Katah krama sane parum kalih pahtiga saking pigungan sami.

na. Pawilangan suara sane nganutin satenga langkung adiri saking katah krama sane parum.

Pawos 79

Rencana paruman indik pacang nguwah nguwuhin awig-awig kadi ajeng, kengin kamedalang antuk Bandesa Pakraman, kelian banjar utawi saking krama ndiri-ndiri.

ASTAMAS SARGAH SAMAPTA

Pawos 80



- (1) Awig-awig puniki kawastanin awig-awig Desa Pakraman Sekar Pandan.
- (2) Awig-awig puniki manggeh kalaksanayang ring wawidangan Desa Pakraman Sekar Pandan.
- (3) Awig-awig puniki kamargiang ngawit saking kararemin antuk Desa Pakraman Sekar Pandan.
- (4) Awig-awig nganinin sahananing warga lan krama desa. miwah sakaluirin sane kakuub antuk Desa Pakraman Sekar Pandan.

Pawos 81


- (1) Sakaluirin pamargin sane wenten sadurungnia patut kaanutang ring sadaging awig-awig puniki.
- (2) Pamargin pakraman sane durung kabaos sajeroning awig-awig puniki, manggeh kalaksanayang manut tata cara sane sampun ketah mamargi, kaduluran antuk pararem desa .

- (1) Awig-awig puniki kararemin sajeroning paruman krama Desa Pakraman Sekar Pandan duk rahina Buda Kliwon Ugu caka warsa 1935, tanggal 10 Juli 2013.
- (2) Awig-awig puniki kalingga tanganin olih Kelihan Banjar Pakraman sejabag Desa Pakraman Sekar Pandan lan Prajuru Desa Pakraman Sekar Pandan saha kasaksinin olih para manggala praja dinas makadi Kelihan Banjar Dinas Klumpu, Perbekel Desa Klumpu, Camat Nusa Penida, pamekas Bupati Klungkung maka Murdaning Pamikukuh.
- (3) Luir Sang Ngalinggatanganin :

ha. Kelihan Banjar Pakraman :



na. Prajuru Desa Pakraman Sekar Pandan;



Penyarikan,

I WAYAN BUDRA

Patengen,

I NYOMAN SUDARTA

ca. Para Manggala Pajia Dinas Pinaka Saksi;


Perbekel Desa Klumpu,

I KANIK SUKLA, S.Pt

Kelurahan Banjar Dinas Klumpu,

I NYOMAN BUGATA

Camat Nusa Penida ,



I KENIT SUKLA, SH.
NIP. 19631226 198603 1 011

ra. Bupati Klungkung Maka Murdaning Pamikukuh.

Kailikitayang ring Kantor Bupati Klungkung;

Reg. Nomor : 189/1/H20/2013

Tanggal : 28 Agustus 2013

MENGETAHUI

PLT. BUPATI KLUNGKUNG

TJOKORDA GEDE AGUNG.S.Sos.